

„DOMSKI ŽIVOT“

„DOĐE JOŠ JEDNA GODINA NOVA, SA RADOŠĆU, SREĆOM I
ZDRAVLJEM DA BUDE“



Oktobar, Novembar, Decembar 2017 ,

Broj:48

KORISNICI PIŠU...

USPJEŠNI RADOVI U ČIŠĆENJU KRUGA NAŠEG CENTRA

Naše vrijedne i uspješne uposlenice Službe za edukaciju, i socijalne Službe u protekloj sedmici organizovale su akciju čišćenja i uređenja kruga našeg Staračkog doma u Nedžarićima. Uglavnom se sakupljalo opalo lišće i grane sa parkovskog drveća , koje je u većim količinama , napadalo na prolazne puteve i staze u krugu Doma. Uposlenici pomenute Službe su najljubaznije pozvali i zamolili sve nas koji možemo da izvršimo čišćenje kruga i obezbijedili nam potreban alat (metle, lopate, vreće i drugo.)

Odziv na akciju čišćenja bio je vrlo dobar I učesnici su vrijedno radili na uređenju našeg kruga , bolje rečeno našeg kućnog dvorišta, što je bilo veoma pohvalno. No, posebnu pohvalu zaslužuje gospodin Mujezinović Rahmo , koji je pored tog akcijskog dana , samostalno radio na čišćenju dvorišta i naredna dva dana I to po više sati dnevno.

Bravo i aferim – i hvala ti Rahmane.

Pa , razumljivo je da smo vrlo uspješno obavili navedene poslove, zahvaljujući jasnim I stručnik uputama naših poslovođa, (kako ih mi tada adekvatno imenovavimo), a također što su nas bodrili i hvalili naš kvalitetan rad.

Pošto sam skorašnji stanar ovog Doma, upamtio sam imena nekih od tih poslovođa- uposlenika Službi, a to su : šefica Adela, Sanela, Vahida, Čamila, Ensar i drugi.

Po završetku akcije – posla zajednički smo predahnuli , popili kahvu, čaj ili sok, analizirali radove, i zaključili da će ovo biti potrebno, gotovo redovno raditi.

Dakle lišće žuti i dole već pada..., a mi ćemo ga nadajmo se – još barem koju godinu sakupljati i uređivati naše kućno dvorište.

Nedžarići, 21.10.2017.

Tekst napisao

Ing. Novica Blagojević



KORISNICI PIŠU ...

Za uredništvo biltena “ Domski život”

Uvažena urednice – gđo Sanela ,

Ova tema bi mogla biti interesantna za većinu korisnika Doma.

Lično sam imao poteškoća, više puta, u odbrani od napada pasa skitnica na ulicama i u naseljima našeg grada Sarajeva i šire.

Takvoj opasnosti izloženi smo svi korisnici koji izlazimo i boravimo u gradu i okolini.

“ Pokret za zaštitu životinja – zeleni”, putem javnih medija osuđuje “ ubijanje” (kako oni to govore) divljih životinja i pasa skitnica , posebno od strane lovaca i drugih građana.

U ulozi redovnog dopisnikau tri revijalna glasila u Sarajevu, Mostaru i Banja Luci dao sam argumentovan odgovor zelenim , a svima ukazujem na opasnost od pasa lualica kada izlaze i borave.

Nedžarići, 01.12.2017.godine.

**S poštovanjem,
Blagojević Novica**

ZAŠTO „ZELENI „ NE ŠTITE SVE ŽIVOTINJE

Pokret za zaštitu životinja „ zeleni“ je veoma aktivan u zaštiti divljih životinja i pasa skitnica. U tome posebno upućuju kritike lovcima radi ulova divljači i drugim građanima BiH zbog tamanjenja pasa skitnica , koji napadaju i ljude, (djecu, žene, stare i nemoćne osobe), pri čemu je bilo dosta slučajeva najtežih ugriza , pa i onih sa smrtnim ishodom. Imao sam nekoliko slučajeva veoma oštrih i teških polemika sa nekim „ dušebrižnicima“ o životinjama i protivnicima „ ubijanja“ (kako oni govore), divljih životinja. U svim tim slučajevima branio sam opravdanost planskog odstrela divljači i mislim dasam tzv. zaštitnike divljači prizemljio- kako to naš narod kaže.

Takođe, želim istaknuti neke konkretne primjere – doživljaje iz dugogodišnjeg lovačkog iskustvakojima se uvjerljivo ukazuje da protivnici lova zaista nemaju nikakavih argumenata. Ovo tim više što je dobro poznato, da pravi lovci prvenstveno štite, uzgajaju i razumljivo planiraju odstrel određenih vrsta divljači, u skladu sa lovačkom etikom, propisanim normama i uslovima. , a sve to je regulisano odredbama zakona o lovstvu F BiH.

Slučajevi koje ću ovdje istaći dogodili su se ranije u mojoj aktivnoj nlovačkoj praksi a oni se uslobodnoj prirodi gotovo redovno događaju, što je dobro poznato lovcima i svima drugima koji se bave izučavanjem i praćenjem određenih pojava i dužim boravkom u šumama i drugim prirodnim staništima divljih životinja. Tako ću ovdje navesti samo neke događaje, koje sam doživio u lovu ili drugim prilikama boraveći u prirodi.

PRVI SLUČAJ- krećući se po šumi u lovištu Kovačine, samo što nisam nagazio na već odraslo lane koje je ležalo, preplašeno te poskočilo jedva na tri noge jer mu je prednja desna bila slomljena iznad koljena. Vrlo lako sam uhvatio lane, odnio ga kući, udobno smjestio a zatim otišao u Srednje po veterinara Maunaga Nikolu. Odmah je čovjek spakovao svoju sanitetsku torbu, došao, pregledao lom noge, stavio udlage od daščica, zamotao zavojem i rekao mi kako se nada da će noga prirasti jer je lom bio svjež.Uspjeh je bio potpun i sa nepunih mjesec dana lane je normalno hodalo, skakutalo u dvorištu moje kuće u Nišićima. Svadjeca iz sela su lane jako zavoljela, igrala se sa njim i bilo je dosta suza, kada sam lane , poslije nekoliko mjeseci vratio u lovište.

Brojni su primjeri spašavanja i zaštite divljači, posebno plemenite od strane lovaca i sve se to evidentira u evidenciji lovačkih društava. Nedavno su lovci spasili jednog mrkog medvjeda koji je na području Skakavca pao sa visoke stijene i bio teško povrijeđen.

DRUGI SLUČAJ- čekajući divlje svinje koje su činile veliku štetu na livadama mog amidže Radovana, u samo predvečerje iza sebe sam čuo jezivo cviljenje. Ustao sam sa stolice i vidio lisicu kako munjevitom brzinom davi nejač. Ugledavši mene lisica se dala u bijeg, a ja sam ispalio hitac i ona je pala. Prišao sam do loge, u kojoj je dvoje malih zečića jedva davalo znakove života, a treće zeče je bilo čvrsto stisnuto zubima mrtve lisice.

TREĆI SLUČAJ- u lovištu Ravna planina na obroncima Jahorine, zajedno sa tadašnjim lugarom Granzov Milivojem, učestvovao sam u spašavanju mladih tetrijebova – pilića od napada sove –ušare u kasnim večernjim satima. Bila je to posena i iznenađujuća slučajnost.

ČETVRTI SLUČAJ- negdje početkom 70-tih za vrijeme izuzetno teške zime, u drštvu trojice lovočuvara, i još nekoliko lovaca učestvovao sam u obilasku i pregledu jednog dijela posebnog lovišta „ Igman“ na Igmanu, gdje je samo za jednu noć od vukova stradalo dvadesetak srna.

Tada nažalost nema nikoga od tzv. Zelenih da spasu životinje od niza ovih situacija.

Da dalje ne nabrajam moje lovačke doživljaje, a bilo ih je zaista dosta, uzbuđljivih i dramatičnih. Umjesto toga postavio bih samo nekoliko pitanja protivnicima lova divljači i ubijanja pasa skitnica. TA pitanja su:

- 1. Kako to da ti predstavnici ništa ne rade na zabrani ubijanja tj. klanja domaćih životinja kada se dobro zna koliki je taj broj?**
- 2. Zašto protivnici lova nisu ništa preduzeli ili barem priskočili u pomoć lovcima u zaštiti i prihranjivanju divljači za vrijeme teške i dugotrajne zime 2004/2005. Kada je od gladi uginulo, više desetina samo divljih svinja u lovištima KS?**

3. **Da li je protivnicima lova poznato da je lovstvo posebna privredna grana od koje koristi ima i država, lovačke organizacije i lovci imaoci izuzetno vrijednih lovačkih trofeja i drugih dijelova divljači?**
4. **Koje bi bile posljedice u slučaju potpune zabrane lova određenih vrsta divljači, tj nekontrolisanog razmnožavanja i neplanskog gazdovanja gledano sa aspekta mogućnosti prerasmnoženja, što dovodi do degeneracije, pojave epidemije i slično.**
5. **Na kraju željno mislim i predlažem da odgovorni iz tog pokreta uspostave što bolju saradnju sa Lovačkim savezom, BiH , radi zajedničkog djelovanja na zaštiti čuvanju i uzgoju divljih životinja kao i da se uspostave principi zajedničkog rada u borbi u rješavanju problema pasa lotalica.**

Sarajevo, 01.12. 2017.godine





AUTOR TEKSTA: NOVIĆA BLAGOJEVIĆ

POSJETA UČENIKA SREDNJE EKONOMSKE ŠKOLE

Svojom posjetom obradovali su nas i učenici Srednje ekonomske škole, čije generacije već godinama dolaze u Centar, sa profesoricom Senidom Celjo. Učenicu su na ovaj način željeli obilježiti novogodišnje praznike. Uz razne slatkise, muziku, pjesmu i tombolu za korisnike završeno je još jedno prekrasno druženje.

DRUŽENJE SA FORUMOM ŽENA ILIDŽA

Korisnici su uzivali u jos jednom druženju sa Forumom žena Ilidza, koje su obradovale korisnike brojnim kolacima, tortama, slatkisima te raznim slasticama. Druženje je proteklo u prelijepoj atmosferi, i prednovogodisnjem duhu.





POSJETA UČENIKA DRVNO-TEHNIČKE ŠKOLE

Svojom posjetom pred novogodišnje praznike obradovali su nas i učenici Drvno – tehničke škole koji su počastili korisnike, družili se sa njima te uživali u muzici I pjesmi. Radost zbog ispunjenog dana i svoje zadovoljstvo nisu krili ni naši korisnici a ni učenici kojima nije silazio osmijeh sa lica.



POSJETA VRTIĆA LABUDOVI (OBILJEŽAVANJE DJEČIJE NEDJELJE)

U sklopu obilježavanja Dječije nedjelje, a i povodom 1.oktobra - Medjunarodnog dana starih osoba, našu ustanovu su posjetila djeca iz JU "Djeca Sarajevo", tačnije iz vrtića Labudovi.

Grupa od 15 djece, uzrasta od pet godina je došla u pratnji odgajateljica, te su pripremili recitacije i dječije pjesme za naše korisnike.

Uživali smo u dječijim pjesmama i zvonkim glasićima, te se radujemo novoj posjeti.



SRETNĀ NOVA GODINA

U Centru se već uveliko osjeća praznična atmosfera, te smo jednu likovnu sekciju iskoristili za izradu ukrasa, nakita, novogodišnjih čestitki te raznog ukrasnog materijala.

Sve to je zabilježila i kamera FTV, za emisiju Federacija plus, pozitivni primjeri rada i prakse, a upravo naš Centar je istaknut kao primjer pozitivnog rada i djelovanja.



ODRŽAN MEVLUD SA PREDSTAVNICIMA RIJASETA ISLAMSKE ZAJEDNICE

Danas je u Centru organizovan mevlud sa predstavnicima Rijaseta Islamske zajednice sa kojima imamo dugogodišnju saradnju. Džemat iz Pofalića je ovaj put prikupio i vrijednu donaciju u garderobi za korisnike Centra.

Korisnici su proučili mevlud, te se počastili kolačima.



HOR "SEVDALIJE" IZ SARAJEVA POSJETILI NAŠE KORISNIKE

Korisnike svojom posjetom obradovali predstavnici Centra za zdravo starenje Novo Sarajevo, tačnije hor "Sevdalije" Sarajevo.

Hor "Sevdalije" Sarajevo već duži vremenski period uveseljava korisnike svojim prekrasnim izvedbama starogradskih pjesama i sevdalinki.

Korisnike su obradovali ne samo muzikom i pjesmom nego su ih i počastili raznim slasticama. Zahvaljujemo na divnoj saradnji.



BOŽIČNA MISA

Za korisnike katoličke vjeroispovijesti održana je prigodna božićna misa.



POSJETA ČLANOVA AKCUS "SELJO" IZ SARAJEVA I ZAPOSLENIKA "RADIO M" SARAJEVO

Korisnike centra obradovali su članovi AKCUS "Seljo" Sarajevo priredbom kao i zaposlenici "Radija M" Sarajevo, koji su zajedno sa grupom učesnici projekta pod nazivom "Ispunimo srca".

Korisnike su počastili tortom, sokovima, te najaktivnije u plesu i pjesmi poklon paketićima.

Uz orkestar su pjevali pjesme, plesali, a zaigralo se i nezaobilazno kolo. Svoje oduševljenje iskazali su i izjavama za Radio M.





**POVODOM MEĐUNARODNOG DANA HUMANOSTI
POSJETILI SU NAS UČENICI O.Š. "ĆAMIL SIJARIĆ"**

Naše korisnike su povodom Međunarodnog dana humanosti posjetili i počastili poklon paketima učenici O.Š. "Ćamil Sijarić", sa nastavnim osobljem.

Zahvaljujemo na posjeti i ostvarenoj saradnji.





STUDENTICE PSIHOLOGIJE U POSJETI CENTRU

Svojom posjetom su nas obradovale studentice psihologije koje su obavljale praktičnu nastavu u Gerontološkom centru, te iz tog perioda ih vežu nezaboravne uspomene.

Katarina Mišetić i Elma Krzić su posjetom obradovali korisnike i počastili ih, te evocirali brojne uspomene.



POSJETA PREDSTAVNIKA UDRUŽENJA "YOUTH FOR PEACE"

Danas su naše korisnike svojom posjetom obradovali predstavnici udruženja "Youth for peace", članovi Mladih lidera sa svojom predstavnicom koordinatoricom Lamijom Hubanić.

Korisnici su sa omladinom izrađivali čestitke za predstojeće praznike, igrali društvene igre te pjevali i plesali.

Na kraju su ukusnim domaćim kolačićima i sokom počastili sve korisnike.



**ODRŽANO STRUČNO PREDAVANJE ZA KORISNIKE
NA TEMU „ŠEĆERNA BOLEST I PREVENCIJA“**

Danas je u prostorijama Centra održano stručno predavanje za korisnike na temu „Šećerna bolest i prevencija“.

Predavanje su održale članice prvog ženskog Lions kluba u BiH, inače ljekari specijalisti i profesori na Visokoj zdravstvenoj školi.

Ovo je još jedna uspješno realizovana aktivnost i saradnja koju imamo sa članicama Lions kluba. Zahvaljujemo se i radujemo se i budućoj saradnji.



POSJETA UČENIKA O.Š. „MEHMED - BEG KAPETANOVIĆ LJUBUŠAK“ IZ SARAJEVA

Danas su nas svojom posjetom obradovali učenici O.Š., Mehmed - beg Kapetanović Ljubušak“ iz Sarajeva.

Učenici su se družili sa korisnicima, igrali društvene igre, te pjevali i plesali. Zahvaljujemo se nastavnom osoblju i učenicima, na izdvojenom vremenu te na poklonima koje su pripremili za sve korisnike prisutne u klubu.



**POSJETA PREDSTAVNIKA UDRUŽENJA PENZIONERA KANTONA
SARAJEVO**

Posjetili su nas predstavnici udruženja penzionera Kantona Sarajevo, na čelu sa predsjednicom udruženja gospodjom Vesnom Grgić.

Družili su se aktivno sa korisnicima, te su odgovarali na brojna pitanja iz oblasti penzijsko-invalidskog osiguranja, te penzionerima kao najugroženijoj kategoriji stanovništva.

Obećan je nastavak saradnje, te kontinuitet u zalaganju za narušena prava penzionera, koji spadaju u najugroženiju kategoriju stanovništva.



**UČESTVOVANJE NA MEĐUNARODNOM SEMINARU NA TEMU
“ZLOSTAVLJANJE I ZANEMARIVANJE STARIH OSOBA” U BEOGRADU**

U periodu od 01.11.-02.11.2017. godine Gerontološki centar uzeo je aktivno učešće na Međunarodnom seminaru koji se održao u Beogradu vezano za temu “Zlostavljanje i zanemarivanje starih osoba”.

Seminaru prisustvovali predstavnici iz Norveške, Irske, Hrvatske, Srbije i BiH. Seminar su vodile prof.dr. Wenche Malmedal sa Univerziteta nauke i tehnologije iz Norveške (NTNU), Fakultet za medicine i zdravstvene studije u Trondheimu, Odsjek za javno zdravlje i sestrinstvo i prof.dr. Amanda Phelan sa Univerziteta u Dublinu – Irska (UCD), Fakultet za sestrinstvo, akušerstvo i zdravstvene sisteme.

Navedeni seminar je priprema za apliciranje za projekat EU Erasmus + Izgradnja kapaciteta gdje će glavni partneri biti Univerziteti (Norveška, Irska, Srbija, Hrvatska i BiH) a pridruženi partneri će biti Crveni krst iz BiH i Srbije , Fondacija “Zajednički put” iz Hrvatske i KJU “Gerontološki centar” Sarajevo.

Na seminaru aktivno učestvovala šef Službe socijalnog rada Adela Bahto.



POSJETA UČENIKA OSNOVNE ŠKOLE "ISAK SAMOKOVLJA" SARAJEVO

Danas su Gerontološki centar svojom posjetom obradovali učenici osnovne škole "Isak Samokovlija" Sarajevo.

Članovi horske sekcije škole u pratnji nastavnika pripremili su muzički program za korisnike, te ih sve obradovali voćem, toplim čajem i slatkišima.

Obećali su doći opet i uveseliti nas sve zajedno.



POSJETA UPOSLENIKA IZ PRIHVATILIŠTA U BUDIMPEŠTI (MAĐARSKA)

Naš Centar su posjetili uposlenici prihvatilišta, iz Budimpešte, Mađarska. Uposlenici prihvatilišta su razmijenili iskustva sa našim osobljem, o problemima skitnje, prosjačenja te osoba treće životne dobi koji se nalaze u stanju socijalne potrebe, te potrebom za prihvatilištima svuda u svijetu.



POSJETA JU "GERONTOLOŠKI CENTAR" BANJA LUKA

Uposlenici KJU "Gerontološki centar" Sarajevo posjetili su JU "Gerontološki centar" Banja Luka sa ciljem razmjene iskustva u radu sa osobama treće životne dobi.

Tom prilikom se razgovaralo o problematici ustanova i obišli objekti.



BINGO

**DOBITNICI NAGRADNE IGRE BINGO PRETHODNIH MJESECI SU:
LJESKOVICA NISVETA , BATARILO LUCIJA I SEJDIĆ MIRALEM.
ČESTITAMO!!!**



RAĐOVÍ KORISNIKA

Vrijedne ruke naših korisnika su i ovaj put pripremile brojne ukrasne predmete za predstojeće praznike. Da ih u ovako vedrom duhu i raspoloženju sve dočekujemo. Ukrasni predmeti se inače prodaju te su izloženi u holu Centra.



